

in gratiam Lectoris hinc inspergere libet. Et primò quidem in medio areæ obtulit se conspectui nostro fons 80. siphonibus aquam sursum deorsumq; eructans, in cujus apice Neptunus continuâ vertigine circumrotatur, inferius Vulcanus cum famulis suis assiduis ictibus incudem percutit. Occurrebat deinde in angulo quodam Hercules, cum Dracone aureorum pomorum custode clavâ pugnans, quam, quoties Draconis capiti impingit, toties hic aquam in faciem percutientis ejaculatur. (Quod artificium, etsi paulò aliter, Schottus quoq; part. II. Mechan. Hydraul. Pnevum. Class. I. c. 4. Mach. 7. p. 265. describit.) In alio vestibuli extremo comparebat Diana, unâ cum Nymphis ad fonticulum quendam se perluens, circa quem varia animalcula, quasi venatione agitata circumcursitant; tum Actæon è spelunca quadam prodiens colliculum quendam conscendit, sed in viâ à Diana ultricibus undis perfusus, cornibus armatus redit, antrumq; repetit, è quo deinceps humi jacens à canibus suis protrahitur. Proximè hanc machinam sistebat se Hercules, Cerberum ex angulo quodam producens, qui aquam simul & ignem ingenti fragore in ipsum evomit. Defluvium in receptaculo quodam inferius colligitur, ad quod leo aliquis ultra 5. ped. accedens, aquam ex eo hianti ore haurit, exhausturus vel vastissimam cupam, si tantum aquæ afflueret; eoq; peracto ad pristinum locum se recipit: quam posteriorem tamen Machinam laudatissimus ille Artifex, ob varias aliarum occupationum remoras, in effectum (etsi ipsi minimè dubium, planeq; jam exploratum) penitus dare hucusq; nondum potuit. Occupatur quoq; in elaborandâ Machinâ aliâ Hydraulico-Pnevmaticâ, quæ Parnassum cum Musis, instrumenta sua moventibus, repræsentabit: annectetur ei Organon aliquod Hydraulicum, quod ope venti per folles producti harmoniam edet. Quale quidem organon aliud, pridem à se fabricatum, quod 6. cantilenas intonat, idem Vir humanissimus nobis ostendit. Exhibuit deniq; siphonem quendam, quo ad compescenda incendia utitur, qui non ut vulgares alii motu interrupto, sed continuo fluxu aquam ad 70. ped. altitudinem ejaculatur: aliasq; uberrimæ cum utilitatis tum jucunditatis Machinas Hydraulicas, quibus omnibus recensendis supersedeo.

(56.) V. Acta Angl. Mens. Febr. anni 1665. n. I. & Ephem. Erud. XVIII. anni 1666.

(57.) De-